



Fortun beitelag og Skjolden beitelag

Saksbehandlar, innvalstelefon

Hermund Mjelstad, 5764 3124

Avslag på søknad om skadefellingsløyve på jerv ved Kongsøyane i Nørdestedalen i Luster kommune

Fylkesmannen i Vestland avslår søknaden om skadefelling av jerv i Luster kommune ved Kongsøyane øvst i Fortunsdalen, jf. rovviltforskrifta § 9, jf. naturmangfaldlova § 18 andre ledd og § 15 første ledd.

Vi viser til søknad 24. mai 2020 om betinga skadefelling av ein jerv ved Kongsøyane i Nørdestedalen.

Bakgrunn

Lisensjaktperioden for jerv er 10. september til 15. februar. Kvoten for rovviltregion 1 var på 8 jerv, ingen vart felt i region 1 i denne perioden. I perioden 15. februar – 31. mai er det Miljødirektoratet som har myndigheit til å gje skadefellingsløyve på jerv, jf. rovviltforskrifta § 13. Frå 1. juni er det fylkesmennene som har denne myndigheita, jf. rovviltforskrifta §§ 8 og 9. Kvoten for skadefelling er vedteke av rovviltnemnda og for jerv er denne kvoten på 8 dyr.

Vi har fått opplyst frå Statens naturoppsyn (SNO) at jerven som har vore innom åteplassen ved Kongsøyane mest truleg er ei tisper som i år ynglar i Lundadalen i Skjåk kommune. Blir jervetispa felt vil dermed ungane bli verande åleine i hiet og mest truleg døy av svolt.

Vurdering

For region 1 er det ikkje bestandsmål for jerv og dersom det er etablert yngling her, blir denne normalt teke ut av SNO etter vedtak i Miljødirektoratet. For Skjåk kommune i Innlandet fylke i rovviltregion 3 er situasjonen ei anna. I rovviltregion 3 er det bestandsmål på fire ynglande jerv kvart år, og fleire av desse ligg normalt sør for Ottadalen inn mot gamle Sogn og Fjordane grense i rovviltregion 1. Dette har over tid ført til at det er etablering av jerv og yngling av jerv i Luster og Årdal, og med tilhøyrande skade på sau.

Slik var det også i sesongen 2019 då det var omfattande skade i området rundt Nørdestedalen, i same området som no jervetispa oppheld seg regelmessig i. Sauueigarane her fekk erstatta tap av 44 lam



og utbetalt 101 803 kroner i erstatning. Med ei ynglande tise som nyttar dette området i dag, kan vi ikkje utelukke skade i år og.

Fylkesmannen tildelte i fjor sommar skadefellingsløyve på ein jerv etter skadedokumentasjon av SNO i dette fjellområdet, men utan resultat. Området er vanskeleg å jakte i med mykje stor steinur og blokkmark.

Sjølv om Fylkesmannen har myndigheit til å tildele skadefellingsløyve på jerv etter 1. juni, jf. rovviltforskrifta § 9, andre ledd, bokstav c), finn vi det vanskeleg å gje løyve til å felle ei tise som SNO meiner har hiplass med ungar i Skjåk kommune. Dei dyrevernsmessige tilhøva tilseier at dersom tisa blir felt må og ungane avlivast. Miljødirektoratet avslo 27. mai 2020 søknad om uttak av ynglande jerv i Skjåk kommune. I avslaget var det lagt avgjerande vekt på skadehistorikk og skadepotensiale for sau.

Vedtak

Fylkesmannen i Vestland avslår søknaden om skadefelling av jerv i Luster kommune ved Kongsøyane øvst i Fortunsdalen, jf. rovviltforskrifta § 9, jf. naturmangfaldlova § 18 andre ledd og § 15 første ledd.

Klagerett

Partane i saka og andre med klagerett etter forvaltningslova, kan klage over avgjerda innan tre veker etter at avgjerda er motteken. Eventuell klage bør grunngjevast og rettast til Miljødirektoratet. Klagen skal sendast til Fylkesmannen, som anten kan ta klagen heilt eller delvis til følge, eller sende han til Miljødirektoratet for endeleg avgjerd.

Med helsing

Kjell Kvingedal
miljødirektør

Eline Orheim
seksjonsleiar

Dokumentet er elektronisk godkjent

Kopi:

Sogn og Fjordane Bondelag